



Broj: 01/14-02-877/24-1
Sarajevo, 30.04.2024.g.

PREDSTAVNIČKI DOM PARLAMENTA FEDERACIJE BiH

Dana 22.04.2024. godine održana je 19. sjednica Odbora za ekonomsku i finansijsku politiku Predstavničkog doma Parlamenta Federacije BiH (u daljem tekstu: Odbor). Sjednici Odbora prisustvovao je dovoljan broj članova, tako da su ispunjeni uslovi za punovažan rad u pogledu kvoruma i odlučivanja.

Na sjednici je predložen i jednoglasno usvojen sljedeći

DNEVNI RED

1. Prezentacija publikacije "Responding to Foreign Corrupt Influences", Međunarodni republikanski institut – Ured u Sarajevu,
2. Inicijativa za izmjenu i dopunu člana 69. Zakona o radu u FBiH, koju je pokrenula Lana Prlić, zastupnica u Predstavničkom domu Parlamenta Federacije Bosne i Hercegovine,
3. Odgovor Ustavnom sudu BiH, broj: U-5/24, od dana 26. marta 2024. godine,
4. Inicijativa za uvođenje/ugradnju u Prijedloge zakona o porezu na dohodak i doprinosima kategorije 13. neoporezive plate, koju je pokrenula Amra Junuzović – Kaljić, zastupnica u Predstavničkom domu Parlamenta Federacije Bosne i Hercegovine,
5. Inicijativa za razvijanje informacionog sistema putem kojeg će se elektronski povlačiti podaci iz MIP-1023 o isplaćenim plaćama i drugim oporezivim prihodima zaposlenika od nesamostalne djelatnosti, koju je pokrenula Amra Junuzović – Kaljić, zastupnica u Predstavničkom domu Parlamenta Federacije Bosne i Hercegovine,
6. Izjašnjenje Federalnog ministarstva trgovine, broj: 01-02-244/14 od 01.04.2024. godine.

Na osnovu člana 44. a u vezi sa članom 69. Poslovnika Predstavničkog doma Parlamenta Federacije BiH, Odbor podnosi sljedeći:



IZVJEŠTAJ

Ad-1.

Uvodno izlaganje dali su predstavnici Međunarodnog republikanskog instituta (IRI) i upoznali Odbor sa publikacijom "Responding to Foreign Corrupt Influences" koja je vezana za strane investicije u Bosni i Hercegovini, odnosno Federaciji Bosne i Hercegovine s ciljem pokušaja osnivanja jedne vrste nadzornog mehanizma ili vršenjem nadzornih aktivnosti nad stranim investicijama u Bosni i Hercegovini. Nakon uvodnog izlaganja, Odbor je obavio diskusiju tokom koje su članovi Odbora iznijeli svoje prijedloge i sugestije, te na kraju jednoglasno podržali sljedeće

Zaključke

1. Odbor za ekonomsku i finansijsku politiku prihvata prijedlog Međunarodnog republikanskog instituta (IRI) da preuzme ulogu i aktivnosti sudjelovanja u koordinaciji praćenja stranih koruptivnih uticaja u Bosni i Hercegovini.
2. Odbor za ekonomsku i finansijsku politiku prihvata mogućnost učešća u parlamentarnom nadzoru, organizaciji tematskih sjednica i nekim drugim aktivnostima praćenja, edukacije i saradnje sa Međunarodnim republikanskim institutom u vezi stranih koruptivnih uticaja.
3. Odbor za ekonomsku i finansijsku politiku traži od nadležnog državnog ministarstva i radnog tijela Informaciju u vezi provedbe dokumenta i aktivnosti koje se odnose na strane investicije u BiH.
4. Odbor za ekonomsku i finansijsku politiku prihvata prijedlog Međunarodnog republikanskog instituta (IRI) za uspostavljanje zajedničke saradnje sa nadležnim radnim tijelima na državnom nivou i nivou entiteta Republike srpske kako bi bili dio šire koordinacije.

Ad-2.

Uvodno izlaganje dala je zastupnica Lana Prlić koja je i pokrenula ovu Inicijativu, Odbor je obavio diskusiju i jednoglasno donio sljedeći

Zaključak



1. Odbor podržava Inicijativu za izmjenu i dopunu člana 69. Zakona o radu u FBiH, koju je pokrenula Lana Prlić, zastupnica u Predstavničkom domu Parlamenta Federacije Bosne i Hercegovine uz zaduženje Federalnom ministarstvu rada i socijalne politike da dostavi broj korisnika i budžetsku konstrukciju.

Ad-3.

Predsjednik Odbora je upoznao prisutne članove Odbora sa dostavljenim zahtjevom Ustavnog suda BiH, broj: U-5/24, od dana 26. marta 2024. godine u kojem se traži odgovor na navode iz zahtjeva podnosioca, u ovom slučaju Kantonalnog suda u Sarajevu, u vezi osporenog člana 147. stav 1. Zakona o penzijskom i invalidskom osiguranju ("Službene novine FBiH", broj 13/18), odnosno odredbe člana 2. stav 3. Pravilnika o naknadi pogrebnih troškova u slučaju smrti korisnika penzije. U zahtjevu se traži ocjena usklađenosti Zakona s Ustavom BiH i Evropskom konvencijom o ljudskim pravima i osnovnim slobodama i njenim protokolima.

Odbor je detaljno razmotrio podneseni zahtjev, uzimajući u obzir odredbe Ustava i Evropske konvencije koje su predmet ocjenjivanja kompatibilnosti kao i pitanje usklađenosti navedene zakonske odredbe s odredbama Ustava BiH i Evropske konvencije o ljudskim pravima i osnovnim slobodama, a posebno s odredbom člana II/3 k) i m) Ustava BiH, te člana 2 Protokola broj 4 i člana 1 Protokola broj 1 uz Evropsku konvenciju o ljudskim pravima i osnovnim slobodama, odnosno o pravu na imovinu i pravu na slobodu kretanja i prebivališta, te jednoglasno donio sljedeće

Mišljenje

Odbor za ekonomsku i finansijsku politiku Predstavničkog doma Parlamenta Federacije BiH mišljenja je da bi Ustavni sud Bosne i Hercegovine trebao da donese odluku o kompatibilnosti/usklađenosti citirane odredbe Zakona o PIO/MIO s odredbom člana II/3 m) i/ili k) Ustava Bosne i Hercegovine i člana 1 Protokola broj 1, odnosno člana 2 Protokola broj 4.

Ad-4. i Ad-5.

Na sjednici Odbora nije bilo prisutnog podnosioca Inicijativa, tako da je Odbor zauzeo stav da će dostavljene Inicijative razmotriti kada na sjednici Odbora bude prisutan podnosilac Inicijativa u skladu sa članom 51. Poslovnika Predstavničkog doma.



Ad-6.

Odbor je razmotrio dostavljeno Izjašnjenje Federalnog ministarstva trgovine, broj: 01-02-244/14 od 01.04.2024. godine, te isto primio k znanju.

PREDSJEDNIK ODBORA

